

Ո Ր Ո Շ ՈՒ Մ 298/1/11
ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

«16» հունիսի 2022թ.

ք. Երևան

ՀՀ ՊԵԿ Արևմտյան մաքսատուն-վարչությունն, ի դեմս վարչության պետ Գարիկ Մինասյանի, ուսումնասիրելով Վարդան Աբրահամի Գաբրիելեանի (անձնագիր՝ AS0502781) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց՝

Մաքսային մարմինների ժամանակավոր պահպանման պահեստներում մաքսային մարմինների կողմից ապրանքները և տրանսպորտային միջոցները ժամանակավոր պահպանության վերցնելու մասին 25.01.2022թ. թիվ 20 անդորրագրի համաձայն՝ Վարդան Աբրահամի Գաբրիելեանի անունով ժամանակավոր պահպանության են վերցվել 2 տեղ, 9կգ բրուտո քաշով բեռ՝ օժանելիք և ականջակալ, որի վերաբերյալ մաքսային հայտարարագիր և մաքսային հսկողության համար անհրաժեշտ փաստաթղթեր մաքսային մարմիններին ապրանքների ժամանակավոր պահպանության համար սահմանված ժամկետում չեն ներկայացվել:

Սահմանված ժամկետում մաքսային մարմիններին մաքսային հայտարարագիր չներկայացնելու փաստի առթիվ Վարդան Աբրահամի Գաբրիելեանի վերաբերյալ 01.06.2022թ. կազմվել է մաքսային կանոնների խախտման վերաբերյալ արձանագրություն՝ ՀՀ մաքսային օրենսգրքի 194-րդ հոդվածի հատկանիշներով, այն է՝ սահմանված ժամկետում մաքսային մարմիններին ապրանքների և տրանսպորտային միջոցների վերաբերյալ մաքսային հայտարարագիր չներկայացնելը, ինչպես նաև մաքսային հսկողություն իրականացնելու համար ապրանքների և տրանսպորտային միջոցների վերաբերյալ անհրաժեշտ փաստաթղթերը չներկայացնելը՝ անկախ գրավոր հայտարարագիր ներկայացնելուց:

Վարդան Աբրահամի Գաբրիելեանի սահմանահատումների պատմությունը ստանալու և վերջինիս՝ ՀՀ-ում գտնվելու հանգամանքը պարզելու նպատակով՝ ՀՀ ՊԵԿ Արևմտյան մաքսատուն-վարչության պետի 06.06.2022թ. թիվ Ն/21.1/97988-2022 գրությամբ հարցում է իրականացվել ՀՀ ՊԵԿ ներքին անվտանգության վարչություն, որին ի պատասխան 10.06.2022թ. թիվ Ն/2-4/101108-

2022 գրությամբ ստացված տեղեկատվության համաձայն՝ քաղաքացի Վարդան Աբրահամի Գաբրիելեանը 23.02.2022թ-ից գտնվում է ՀՀ-ից դուրս:

ԵԱՏՄ մաքսային օրենսգրքի (այսուհետ՝ նաև Օրենսգիրք) 109-րդ հոդվածի 1-ին մասի համաձայն՝ մաքսային հայտարարագիրը ներկայացվում է մաքսային մարմին, որը, անդամ պետությունների՝ մաքսային կարգավորման վերաբերյալ օրենսդրությանը համապատասխան, իրավասու է գրանցելու մաքսային հայտարարագրերը:

Նույն հոդվածի 2-րդ մասի համաձայն՝ մաքսային հայտարարագիր ներկայացնելիս ապրանքները պետք է գտնվեն այն անդամ պետության տարածքում, որի մաքսային մարմին է ներկայացվում այդ ապրանքների մասին մաքսային հայտարարագիրը:

Օրենսգրքի 110-րդ հոդվածի համաձայն՝ միության մաքսային տարածք ներմուծվող ապրանքների մասին մաքսային հայտարարագիրը ներկայացվում է մինչև ապրանքների ժամանակավոր պահպանման ժամկետի լրանալը կամ սույն Օրենսգրքով սահմանված այլ ժամկետում:

Օրենսգրքի 101-րդ հոդվածի 1-ին մասի համաձայն՝ ապրանքների ժամանակավոր պահպանման ժամկետը հաշվարկվում է ապրանքները ժամանակավոր պահպանման հանձնելու համար ներկայացված փաստաթղթերը մաքսային մարմնի կողմից գրանցվելու օրվան հաջորդող օրվանից և կազմում է 4 ամիս՝ բացառությամբ սույն Օրենսգրքի սույն հոդվածի 2-րդ կետում և 259-րդ հոդվածում նշված դեպքերի:

Օրենսգրքի 101-րդ հոդվածի 2-րդ մասի համաձայն՝ միջազգային փոստային փոխանակման վայրերում (հաստատություններում) պահպանվող միջազգային փոստային առաքանիների, ինչպես նաև ուղևորին չհանձնված կամ նրա կողմից չպահանջված, օդային տրանսպորտային միջոցով Միության մաքսային սահմանով տեղափոխվող ուղեբեռի դեպքում ժամանակավոր պահպանման ժամկետը կազմում է 6 ամիս:

Օրենսգրքի 83-րդ հոդվածի համաձայն՝ 1-ին մասի համաձայն՝ որպես մաքսային ընթացակարգերով ձևակերպվող ապրանքների հայտարարատուներ կարող են հանդես գալ՝

1) անդամ պետության անձը՝

որն օտարերկրյա անձի կետ կնքված այն գործարքի կողմերից է, որի հիման վրա ապրանքները տեղափոխվում են Միության մաքսային սահմանով.

որի անունից և (կամ) որի հանձնարարությամբ կնքվել է սույն ենթակետի երկրորդ պարբերության մեջ նշված գործարքը.

որն ունի ապրանքների տիրապետման, օգտագործման և (կամ) տնօրինման իրավունք, եթե ապրանքները Միության մաքսային սահմանով տեղափոխվում են այն գործարքի շրջանակներից դուրս, որի կողմերից մեկն օտարերկրյա անձ է.

որը Միության մաքսային տարածքում գտնվող օտարերկրյա ապրանքների մասով օտարերկրյա անձի կամ անդամ պետության անձի հետ կնքված գործարքի կողմերից է.

որը «մաքսային տարանցում» մաքսային ընթացակարգի հայտագրման ժամանակ առաքողն (էքսպեդիտորն) է:

Օրենսգրքի 84-րդ հոդվածի 2-րդ մասի համաձայն՝ հայտարարատուն պարտավոր է՝

1) կատարել ապրանքների մաքսային հայտարարագրում.

2) սույն Օրենսգրքով նախատեսված դեպքերում մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր.

3) ներկայացնել հայտարարագրվող ապրանքները՝ սույն Օրենսգրքով նախատեսված դեպքերում կամ մաքսային մարմնի պահանջով.

4) վճարել մաքսային վճարները, հատուկ, հակազնագցման, փոխհատուցման տուրքերը և (կամ) ապահովել դրանց վճարման պարտավորության կատարումը՝ սույն Օրենսգրքին համապատասխան.

5) պահպանել մաքսային ընթացակարգին համապատասխան ապրանքների օգտագործման պայմանները կամ ապրանքների առանձին կատեգորիաների համար սահմանված այն պայմանները, որոնք, սույն Օրենսգրքին համապատասխան, ենթակա չեն մաքսային ընթացակարգերով ձևակերպման.

6) կատարել սույն Օրենսգրքով նախատեսված այլ պահանջներ:

Օրենսգրքի 84-րդ հոդվածի 3-րդ մասի համաձայն՝ հայտարարատուն, անդամ պետությունների օրենսդրությանը համապատասխան, պատասխանատվություն է կրում նույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ ներկայացնելու, ինչպես նաև մաքսային ներկայացուցչին անվավեր, այդ թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

ՀՀ մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է ՀՀ մաքսային օրենսդրությամբ և մաքսային ոլորտին առնչվող ՀՀ միջազգային պայմանագրերով ՀՀ մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 194-րդ հոդվածի համաձայն՝ սահմանված ժամկետում մաքսային մարմիններին ապրանքների և տրանսպորտային միջոցների վերաբերյալ մաքսային հայտարարագիր չներկայացնելը, ինչպես նաև մաքսային հսկողություն իրականացնելու համար ապրանքների և տրանսպորտային միջոցների վերաբերյալ անհրաժեշտ փաստաթղթերը չներկայացնելը՝ անկախ գրավոր հայտարարագիր ներկայացնելուց՝ առաջացնում է տուգանքի նշանակում՝ 50,000 դրամի չափով:

ՀՀ մաքսային օրենսգրքի 219-րդ հոդվածի 2-րդ կետի համաձայն՝ գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Սույն գործի փաստական հանգամանքների և կիրառման ենթակա իրավական նորմերի համադրված վերլուծությունը փաստում է, որ Վարդան Աբրահամի Գաբրիելեանն իր անունով ժամանակավոր պահպանության հանձնված ապրանքների վերաբերյալ օրենքով սահմանված ժամկետում հայտարարագիր և մաքսային հսկողության համար անհրաժեշտ փաստաթղթեր չի ներկայացրել, ինչը հանգեցրել է վերջինիս կողմից ՀՀ մաքսային օրենսգրքի 194-րդ հոդվածով նախատեսված մաքսային կանոնների խախտման:

Հիմք ընդունելով վերոգրյալը և ղեկավարվելով ՀՀ մաքսային օրենսգրքի 206-րդ հոդվածով, 221-րդ հոդվածի 1-ին մասի «ա» ենթակետով և Վարչական իրավախախտումների վերաբերյալ ՀՀ օրենսգրքի 32-րդ և 234-րդ հոդվածներով՝

Ո Ր Ո Շ Ե Ց՝

1. Վարդան Աբրահամի Գաբրիելեանին ենթարկել վարչական պատասխանատվության ՀՀ մաքսային օրենսգրքի 194-րդ հոդվածով և նրա նկատմամբ նշանակել տուգանք **50000 ՀՀ դրամի** չափով:

2. Որոշման մասին օրենքով սահմանված կարգով իրազեկել Վարդան Աբրահամի Գաբրիելեանին:

3. Սույն որոշումը ՀՀ մաքսային օրենսգրքի 221-րդ հոդվածի 2-րդ մասի համաձայն՝ ուժի մեջ է մտնում կայացման պահից և ուժի մեջ մտնելուց հետո կարող է 10-օրյա ժամկետում բողոքարկվել վերադաս մաքսային մարմին կամ երկամսյա ժամկետում ՀՀ վարչական դատարան:

Սույն որոշմամբ նշանակված տուգանքի վճարման հաշվեհամարներն է 900005024055 (ՀՀ պետական բյուջե, կենտրոնական գանձապետարան, Արևմտյան մաքսատուն-վարչություն, ԿՈԴ 90):

ՀՀ ՊԵԿ ԱՐԵՎՄՏՅԱՆ

ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ



ԳԱՐԻԿ ՄԻՆԱՍՅԱՆ